

YICH WLLOPE DAN' BZOJ POSTL SAN PEDRO

Pedron' bzoje' yich ni ke be'nn ka' nxenra'll Jesucriston'

1 ¹ Nada' Simón Pedro lloña' xchin Jesucriston', bse'le' nada' naka' postl ke'e. Lloja' re' ba lloñira'llre Jesucriston'. Le'e bene' nench nxenra'llre' kan' lloño neto', le zeje' lixheje nake' Xanllo Dios be'nn wasrá kello. ² Lloñaba' gahrencha Diosen' re', na' wzoe' yichjra'llda'oren' so kwezre nbaraz dan' nombia're Jesús be'nnen' nak Xanllon'.

Dan' llaya'l gon lli'o nxenra'll-llo Criston'

³ Dan' nap Diosen' yel wak xhen na', ba lloñne' lli'o yeolol da yálljello, nench na' de yel nban kello, na' gonllo kan' lle'nre' na'. Lloñne' da ka' le ba nombia'llo Criston', na' Cristo be'nnen' brej lli'o, nake' be'nn za'k be'nn cha'o. ⁴ Na' dan' nake' be'nn za'k na', na'llen' ba bne'e gahrenne' lli'o, na' gone' da wen kello. Za'k dan' bne'e ka', le kan' bne'e na' llakrenen lli'o, nench yeyak yichjra'llda'ollon' wen kan' nak ke Le'e, na' gak kwey yichjillo da xhinnj dan' ll-lleyi' be'nn bi nxenra'll Dios, lloño ake' kon ka nen ke xpe'r ake'. ⁵ Ke len na' lli'o nxenra'll-llo Jesucriston', llaya'l gonllo ga zerao sa'kello nench gonll-llo wen ye ra'te, na' nench chejnie'llello. ⁶ Na' gonllo ga zerao sa'kello nench bi nnebia' da xhinnjen' lli'o. Llaya'l setezllo wxenra'll-llo Dios kat bi da za'kzi'llo, na' llaya'l sokzlllo gonlloe' xhen. ⁷ Na' llaya'l llie'llo be'nn llwelljillo be'nnen' lloñira'll Jesucristo na', na' lekze llie'llo yeololte be'ne. ⁸ Le cha' naollo lloñllo yeolol da ki, na'llen' gakklo kan' llaya'l gak lli'o nombia'llo Xanllo Jesucriston', na' bi nnitrao dan' ba nxenra'll-lloe'n. ⁹ Na' no be'ne bi lloño da ki ba bnía' gonllo na', nchol yichjra'llda'we'n, na' bi nna chejnie're' kan' llaya'l gone' na'. Nakbie' ba gonra'lle' ba bayib Diosen' ra'llda'we'n bi da xhinnj ka' bene' do kana'. ¹⁰ Be'nn bi'che, len na' gonllo ga zerao sa'kello, nench na' chejle'llo da li ba brej Diosen' lli'o lloñira'll-lloe'. Na' cha' gonllo ka', kbat kweyi'llo. ¹¹ Na' nbaraz wareb Diosen' lli'o kate yellinllo gan' llía Xanllo Jesucriston' llnebie' ke chnare, be'nnen' nak wasrá kello.

¹² Ke len na' bi gatra'lla' yo'y ras we'rena' re' di'lle ke da ka' ba bnekza' re', nench lljadinra'llre, la'kze ba nnézere kan' bnía' na', llgoa' ltip re' wxenra'llre di'll li ke Diosen' dan' ba nnézkzere. ¹³ Na'llen' llakra' chak nna nbana', yepa' re' da ki nench lljadinra'llre. ¹⁴ Nnezra' wyobjelle gata' nada', le ka'n ba bzejnie' Xanllo Jesucriston' nada'. ¹⁵ Ke len na' gona' kon ga zerao sa'kra' nench lljadinra'llre kan' bnía' da ki kat ba gota'.

Postl ka' bre'e akre' kan' ben Diosen' broe're' yel za'k ke Criston'

¹⁶ Ka nak dan' bzejnie'to' re' ke yel wak ke Xanllo Jesucriston', na' ke dan' yede' da yobre na', kere di'll da bdirjla'll neto' postlen', le bre'kze yejraoto' kan' broe' Diosen' yel za'k ke Jesucriston'. ¹⁷ Bre'toe' kan' be'e Xallo Diosen' Le'e yel bara'nn xhen na', na' kan' bzechj Dios be'nnen' za'k xen na' Le'e to beni' xhen, na' bne'e: "Be'nn nin' xhi'nna' nllie'ra' llawere', na' llaza'kra'lla' kan' nake'n." ¹⁸ Neto' b́eneto' kan' bne Dios be'nnen' zo yebán', kan' zerento' Xanto'n rao ya' gan' gok ka'.

¹⁹ Napkzlllo xti'll Diosen' dan' bzoj be'nn ka' be'e xti'll Diosen' kana', na' nnézello naken da li. Na' gonkzre wen cha' chejle're da ka' bzoj ake'n, na' wseni'n lo yichjra'llda'ore ka llon to yi', llseni'n ga nak xchole. Bi llaya'l lljachie'llo, wzenayllo yeo lla chak llin lla yed Criston' da yobre, na' ko'lle' beni' ke'en lo yichjra'llda'ollon'. Na' katen' yede' na', gonen ka llak kat llra' berj xsiren' kat ba lleni'. ²⁰ Na' da ni naken da lliarao xhen chejnie'llo: di'll dan' bzoj be'nn ka' be'e xti'll Diosen' kana', ni ton bi chejnie'llon to wraszlo. ²¹ Le ni to da ka' bzoj ake'n, bi naken xhbab ke leakze'. Zan nak ake' be'nn gok rao na'a Dios, na' bne ake' dan' goll Spíritu ke Diosen' leake', na' bzoj akte'n.

Be'nn ka' llzejnie' xti'll Diosen' krere

(Judas 4-13)

2 ¹ Kana' blloj bal be'nn Israelen' bxhiye'e ake', basné ake' lloe' ake' xti'll Dios, na' ka'n gonkze no be'nn ak wzejnie' akre' re' di'll wenra'llen' wxw willje. Yeyirjla'll ake' ka gon ake' wzejnie' akre' re' di'll dan' wleyi' re', ni ke gakbe'zere. Wkwás ake' ke Xanllo Jesucriston' ka'le, be'nnen' basrá lli'o, zan wllin lla kweyi' ake'. ² Be'nn zan nnao leake', gon ake' ka nen ke ake' no da xhinnj. Na' ni ke leake' lloj be'nne ne ake' bibi za'k Di'll Wen ke Diosen' dan' llroe' dogarj nez wen na'. ³ Na' be'nn wenra'll ka' sera'll ake' wka'a ake' xhmellre. Len na' wzejnie' akre' re' da garjla'll leakze', nench we'e akre' mell. Bixha kana'te nchoybia' Diosen' ke ake' kweyi' ake'.

⁴ Bi bazi'xhen Diosen' ke angl ka', kan' ben ake' da xhinnjen', lo yi' gabil bse'le' leake' gan' nak xchole, na' zjalla'a ake' nllej ake' gden chak llin lla we'e leake' yel llza'kzi' ke chnare. ⁵ Leska' bi bazi'xhene' ke be'nn ka' blla'a yellrio ni kana', kan' bzo da Noé. Ben Diosen' to yejsi'o xhen da blleyi' leake'. Bdixjwe' da Noén' leake' kan' llaya'l gon ake' da zej lixhej. Na'llen' basrá Diosen' le'e ren ye gall be'nn lwellje'. ⁶ Na' bachoyra'll Diosen', lekze blliyie' yell gan' bsi'i ake' Sodoma, na' ren yell gan' bsi'i ake' Gomorra kana', yel wen da xhinnj ke be'nn ka' blla'a yellen'. Bzeye'n bayakten de. Na' bene' ka' nench llasnisre' be'nn ka' za za'k, we'e yel llza'kzi' ke ake' cha' bi wzoa ake' xti'llen'. ⁷ Na' ka blliyie' yell ka', na' basre'e be'nnen' golle Lot be'nnen' gok be'nn wen

rawe' na', le Lot na'n goke lo ra'llda'we' ka da xhinnj ka' ben be'nn ka blla'a yell ka'. ⁸ Loten' goke' to be'nn wen, na' bllayrawe' lo ra'llda'we' ka nak bre're', na' benre' yeo lla ka dan' ben be'nn ka' da bi llaya'l gon ake'. ⁹ Xanllo Dios na' nnezre' akre gone' yesre'e lli'o nxenra'll-loe', ka nak da ka' za'k, lle'nen kwey yichjllae', na' nnezre' akre gone' nench be'nn ka' bi nak be'nn wen rawe' na', so ake' sa'kzi' ake' kat llin lla wchoye' ke ake' ke chnare.

¹⁰ Dios na' we'e da sa'kzi' be'nn ka' llon akteze' kon da nen ke xpe'r ake'. Leake'n bibi bara'nn llap ake' Xanllo Dios. Ni ke lleb akze' llon ake' kon da nen ke ake', nnechach ake' ke yeololte wnebia' ake'. ¹¹ Na' ka nak angl ke Diosen', la'kze nak akll'e' be'nn warll ka lli'o be'nnach, na' nap ake' yel llnebia' xhenll ka lli'o, na' leake'n bi llayaxhj akre' bi da nne ake' ke no be'nn za'k rao Dios.

¹² Na' ka nake be'nn ki llzejnie' akre' di'll wenra'llen', nnechach ake' ke da ka' bi llejnie' akre'n. Nak ake' ka bayi'xe, le bayi'xen' kon llon Diosen' llarj akba', na' lljaxen be'nnach leakba' llaso'teba'. Ka'kzen' kweyi' be'nn ka' llzejnie' di'll wenra'llen'. ¹³ Ba llayrao ake' kan' bsa'kzi' ake' be'nn yobre. Na' llase'j llasaoxen ake' yeo lla. Na' kat lladopren' llzore llni, leake'n za'k ake' gan' lla'ren', bill lliye'e akzre' cha' bi llon bi ne ake', le ka'n ziye'e da xhinnjen' leake'. Llak akre' zo ake' nbaraz, llon ake' kon da nen ke ake'.

¹⁴ Kate llre'e akre' no're, zera'll ake' gonrén ake' leake' da xhinnj, bi lljachie' akre' llon ake' da xhinnj. Na' llko'yel akre' be'nne bi nna gombia' Jesucristo, nench gonrén ake' da xhinnjen'. Be'nn ka' llzejnie' di'll wenra'llen', bayo'rao ake' zera'll ake' bi de ke be'nne. Len na' llwie Dios kan' llon ake'n. ¹⁵ Le ba bsanra'll ake' nez li ke Diosen'. Ba bka'a ake' nez xhinnj na'le, kan' ben da Balaam be'nnen' be'e xti'll Diosen' kana', be'nnen' gok xhi'nn da Beor. Balaam na' gokra'lle' chixhj ake' le'e, nench nnabe' sa'kzi' be'nn ak. ¹⁶ Na' to burr ba bi llak nne, ben Diosen' bnneba' ka to be'nnach, na' bdilba' le'e ke yel ke llejnie' ke'en, nench na' bill gone' da xhinnj ke'en.

¹⁷ Be'nn ki nak ake' ka to bej yeche ga bibi nis llia, na' nak ake' ka to bej ze yebá da ll-lli'y to be' xhen. Na' nlloyen ke ake' sa'kzi' ake' lo gabilen' ke chnare ga nak xchol kwis. ¹⁸ Le lloe' ake' di'll wallojlllo kwis llayoe'rao kwin ake', na' llko'yel akre' be'nn za ballach lo da xhinnjen', nench gon ake' da xhinnj yobre da nakll zdo', da lle'n akre' gonrén xpe'r ake'n, ka da llonkze no be'nne bi nombia' Dios. ¹⁹ Be'nn ka' llzejnie' di'll wenra'llen' lle ake' leake', wzo akll'e' nbaraz gon ake' biteze da nen ke ake', la'kze nak ake' ka to be'nn wen llin ke no da nak yel zdo'. Le yeololkzlllo naklllo ka to be'nn wen llin ke da xhinnjen' kat llonllo kon da nen kello. ²⁰ Na' be'nn ka' ba nombia' Xanllo Jesucristo be'nnen' basrá lli'o, ba balloj ake' rao da xhinnj ka' nak zdo' rao yellrio ni, na' cha' da xhinnjen' gonen leake' gan da yobre, we'e ake' latj gon ake' da

xhinnjlle, ka'kze yellayrao akle' kerke kan' gok rao dan' balloj ake' da nell na'. ²¹ Wenre chenak bi bembia' akse' xhneez Diosen' dan' zej lixhej na', kerke da brej yichj ake' nez wen na', dan' bllia Diosen' bia'a gonllo. ²² Ba benen ke ake' ka ke to di'll dan' ne: "Be'kwn' bayaoba' da bayebba', na' kuchen' ba bwazje'n, ba jallo'ba' lo bennj da yobre."

Jesucriston' yede' da yobre

3 ¹ Be'nn bi'che, nllie'ra' re', yich wlopen' dan' llzoja' re' ni. Na' llopten' ba bzoja' dan' lle'nra' gonre xhbab lixheje. ² Lelljasa'ra'll di'll dan' bzoj be'nn ka' gok rallna'a Dios be'e ake' xti'lle'n kana'. Leska' lelljasa'ra'll dan' nllia Xanllo bia'a gonllo, be'nnen' nak wasrá kello, di'll dan' ba bzejnie' postl ka' re'.

³ Da ni naken to da lliarao chejnie'ren'. Ka naken ba zo rez yeyoll yellrio ni, lloj be'nn wtijtj akre' xti'll Diosen', gon ake' kon kan' nen ke ake'. ⁴ Na' wtijtj akre' da nak ke Diosen' nne ake': "¿Batxhan' gak kan' bne Diosen' dan' yed Criston' da yobre? Ba got xozxta'ollo ka', na' toz ka nna llakse kan' bxhe yellriote." ⁵ Be'nn ka' llasné ka', bi lle'n akre' gon ake' xhbab kan' ba ben Diosen'. Kan' bxhe yebá ren yellrio, to bneze' gaken, na' le gokten kan' bne'en. Bxhe yellrion' radj nisda'on, na' nechjen doxhenen. ⁶ Na' da ka' bene'n, bllin lla ka blliyie'n kone yejsi'on gok kan' babia nisen' doxhen yellrio. ⁷ Na' yebán' ren yellrion', nllia Diosen' bia'a nak aksen kan' naken kana', na' kat llin lla gak yel koxchisen', kana' wzeje'n katen' gone' da sa'kzi' be'nn wen da xhinnj ka' ke chnare.

⁸ Na' re' be'nn bi'che, nllie'ra' re', na' lle'nra' bi ganra'llre da ka' nia'n, le Xanllo Diosen' toz ka llakre' tlla, ka to mir iz, na' to mir izen' llakre'n ka tlla. ⁹ Bal be'nne llak akre' ba bllie Xanllo Jesucriston', bi nna yede' da yobre kan' bne'e kana'. Kere nello ll-llere'n, nna llape' yel llxhenra'll ke lli'o be'nnachen', na' lle'nre' ni tollo bi kweyi'llo. Lle'nre' yeolol-llo yeyátello da xhinnj kellon'.

¹⁰ Na' Xanllo Jesucriston' yede' da yobre ka bi gakbe'e be'nne, ka llon to be'nn wan kat lloe' lo yo' ga lljalane', na' bi llakbe'e akre'. Kana' gak to llakia llebraz, na' kweyi' yeolol da ka' llre'llo le' yebán', kweyi' aken lo yi' xhen na', leska' yellrion', na' da zjadé rawe na', chey aken.

¹¹ Na' kan' llwiallo te ke yeolol bi da de, llaya'l wiallo ka da ka' llonllo, na' sollo gonllo da wen, na' wxenra'll-llo kwis Xanllon'. ¹² Na' llaya'l so kwezlllo batxhan' llin lla gon Diosen' gak yel llza'kzi', na' gonllo ka yob gaken. Ka lla na' ga'lnninn le' yebán', na' dan' llre'llo le' yebá na', ga'lnninn aken, na'll yerán aken. ¹³ Zan lli'o zollo rez yekobe' le' yebán' ren yellrio na', kan' ba bne Dios na', ga ga't da zej lixheje.

¹⁴ Ke len na' be'nn bi'cha' nllie'ra', chak bezllo da ki gak na', llaya'l gonllo ga zerao sa'kello nench na' sollo nbaraz rao Dios, nench bibi do'l ga't kello da gon lli'o be'nn wen da xhinnj. ¹⁵ Na' llaya'l gakbe'llo Xanllo

Diosen' nape' yel llxhenra'll ke lli'o be'nnach nench yesre'e lli'o. Leska'n ba bzoj be'nn bi'chllo Pablo be'nnen' nllie'llon', lloe' di'll ke yel si'n na', ba be'e Diosen' le'e. ¹⁶ Na' yeolol yich ke'e ka', lloe'n di'll ke da ka' ba bzoja' na', la'kze bzoje' bal da nak bni' chejnie'llo. Na' be'nn bi nna chejnie're' xti'll Diosen' kwasro, na' bi nna wxenra'llya'nne' Le'e, llejnie' akre' da ka' nlla're, ka'n llon ake' llchok ake' xti'll Diosen', na' billre da ka' nyoj na', na' len na' ngo'n leake' nez da wlleyi' leake'.

¹⁷ Ke len na' be'nn bi'che, nllie'ra' re', ba nnézere da ka' bzoja' re'. Na' lewiá bi chejle're xti'll be'nn ka' bi llzoa xti'll Diosen', be'nn llon da zej krere, nench ke bixre bill gonre kan' lle'ne Dios na'. ¹⁸ Na' legakbe'lle kan' llakrén Xanllo Jesucriston' re' na' gombia'llre', Jesucristo be'nnen' basrá lli'o ke chnare. Llaya'l gonlira'll-lloe' nna', na' ke chnare. Ka'n gakchga.